

LE FENNE JÉANTE

PATOIS D'AYMAVILLES

Le fenne jéante sayàn balle é rebeuste é predzaon an lenva que gneun comprégnâ; sayàn arbeillaye atò de londze juppe de dra que de tenzentèn alaon lavé a la goille de Provèche.

I veladzo nàye po de boueuille é, pe quii dève, faillè décrotché ba pe lo greup canque a eun petchoù plan, i pià d'ân rotse, ieui lève formâ, dedeun eun crot, eun petchoù laque.

Le fenne de Provèche làyàn pourtó bo lé de lavieui de bouque que euncó le fenne jéante eumpléyaon can alaon fiye bouiya i cller de leunna.

Bechaon se for le juppe su le lavieui quèun sentchè lo tapadzo canque i veladzo.

Totte le dzi se frémaon i mitcho : làyàn bramente pouiye de salle fenne jéante! Mi leur, fenè leur travaill, tornaon su pe le barme, damón Fontan-èi, deun la parotse de Tsalàn-Dézot, su pe la comba d'Àyas.

An бага seurtoù féjè eunmaleché le fenne di veladzo: le fenne jéante se tracasaon jamì de beutté sétché le lavieui aprì ai fé bouiya é pai, can leur làyàn fata de le-z-eumpléyé, le-z-accapaon éparpaillà i mentèn di laque.

Dèisèn faillè pi allé tsertché de râti ou de pertse pe le treiné canque i bor, avouì la reusca de beilloqué deun lève!

Se plégnàvon beun sovèn de so seuilla avouì leur-z-ommo, mi leur lèi baillaon po fèi.

“Baliverne di femalle!! deboillade-vo-zé!” dijàn le-z-ommo

Leur sayàn llouèn totta la senâ: bèichaon bo eun plan pe tsertché de travaill é tornaon i mitcho renque lo desando nît pe vire la fameuille é porté su le comechón.

Le fenne di veladzo vegnaon todzor pi greundze seurtoù péqué, dèi tchica de ten, seutte créateue djemì sarvadze, totte depegnéye, avouì de beurte grimme, làyàn eungnouó a viondé é bamban-é to lo lon di tsarriye di veladzo.

Biclléyaon pe le fenitre, a drèite, a gotse; de cou pasaon belle totta la dzornó a avétché le fenne que felaon dedeun le beui. Féjàn po de djestre, prédzaon renque euntre leur avouì de drolo de réno que gneun comprégnâ.

Le fenne de Provèche ouzaon po le tsaché ià : làyàn pouiye de le fiye eunmaleché, mi gremelaon avouì le leur-z-ommo tcheu le cou que tornaon i mitcho:

“Nèn pouiye! No sen po sen que lèi pase pe la tita: pourian feunque entré é no-z-étranllé comme de porseleun! Senque pouen-nó fiye contre sisse moustre?”

Le-z-ommo, stouffie de le senti borboté todilón, a forse làn pi désidó de lèi vire tchica pi cller deun seutta conta. Làn tsardjà eun di pi robeusto pe resté i veladzo a véillé.

Si ommo, arbeillà comme an femalla, lè betó-se a felé dedeun lo beui é là quetó la pourta djemì iverta.

Eunna di fenne jéante, po mancó, lèt arrevéye: sè plachéye su lo lender é avétsae querieuiza tcheu le mouvemàn de la noutra fileuza. Aprì an pouza là deut eun patoué: “Boudza, boudza fileuza di grouse couése, te feuille pocca é malamente!”

Lo dzoveun-o, que dza se forchâ de po rie, avouì totta salla confejón de catì, de fi, de lan-a, sè sopenù comme an fezetta, là bechà le sabó su lo solàn é la fé eun bo cafarno. La fenna jéanta, totta ésarvadjéye, lè partia ià a galop, eun sopatèn la juppa pezanta.

Le dzor aprì, seutta conta là belle comenchà a fiye lo tor di veladzo: eungn argumàn amuzàn pe le véillà, canque a viìn an conta foula pe fiye rie.

“Son po grame” dijàn le-z-ommo pe tranquilizé le femalle.

“Son maque tchica querieuize...baste lèi fiye “ouf” é lambon ià comme de livre”.

Can mimo le fenne jéante renonchaon cheur po de bèiché i veladzo é vegnaon todzor pi euntregante. Fetsaon lo nou pe le piillo avouì eungnàtrachón particuilléa pe lo fouà: se plachaon a lèntor di fornet é avétsaon avouì mervèille le bocón de bouque que brazéyaon; lèi tapaon deussù de brantseillón, de tsapoteun pai le flamme vegnaon todzor pi âte. Làyàn bo lèi diye que sen làrie poussù baillé fouà a to lo mitcho, mi leur ren, acoutaon po é lo féjàn co de pi.

Le dzente matse de bouque bièn eumblitéye deun la remiza levraon vitto é le fenne de Provèche sayàn fran i dézespouer: alaon tsertché de brantse setse ià pe lo bouque, mi le fenne jéante beurlaon euncó sen.

Feunque pe le-z-ommo la situachón lie eun tren de viìn eunsuportabla: la demendze, a la plase de se repouzé ou fiye fita, djèjàn allé i bouque! Eun mimo ten le fenne jéante tredoillaon ià pe lo veladzo eun cospetèn: “Fé fret! Fé fret ! Fo avié lo fouà! Fé fret !”.

Se catcheun lèi dijè que nàye pami de bouque, seutte moutraon avouì lo dèi la matse de bouque a lèntàn di veladzo.

Seutta baga là baillà eungnidó i montagnar que se son beuttó d'accor pe beutté la paolla feun a si charabàn é làn repondù i fenne jéante:

“Va bièn! D'accor! Fo cllappé sisse tron! Mi vo fo viin no baillé an man!!”

Làn beuttó de grou tron de brenva fran a lènsón di greup, dèisèn, atò la masse, làn fetcha-lei dedeun le coueun pàlardjé tchica lo bouque. Can la fente deun lo tron lèt itéye preui lardze, làn demandó i fenne jéante de beutté le man dedeun la borna pàlardjé mioù lo tro.

Dae de leur làn fé-lo de planta.

To de souite le-z-ommo làn gavó le coueun, le fente pai se son cllouzue a lèntor di man di fenne jéante que son restéye belle gropéye i tron.

Atò an piató le-z-ommo làn pouchà bo di greup le tron é le fenne jéante làn rebatò canque bo i petchoù laque. Le poue matasse criaon a plén-a gueula : “Edzéde-nó! Edzéde-nó!”

Le leur compagne sont arrevaye ba a galop di montagne ; lè arrevéye feunque la leur comandanta: lèi dijàn La Fortessa.

Le-z-ommo làn fé que rebatte a meizón eun frémèn amoddo pourte é fenitre.

Lie dza belle caze teup é le dzi di veladzo làyàn pouiye que le fenne jéante fuchan tornéye pe se vendjé é pai gneun lè pamì chortù de mèizón.

Mi ren lè accapitó !

Le fenne jéante sayàn partie se catché su pe leur barme, su pe le montagne é, dèi adón, gneun là pamì tornó-le vire.

Dèisèn lo ten lè passó é totte seutte conte se son trasfourméye eun léjande. Ara le conton i mèinoù tchica stchapeun de Tchalàn-Dézot pe le fiye risté sayo.